

**Nuummi umiarsualivittaassap sanaartorneqarnissaanut ingerlanneqarnissaanillu siunertaqartumik aktiaateqarluni ingerlatsivimmik pilersitsisoqarnissaanik kingusinnerpaamillu UPA2014-imi ingerlatsiviup umiarsualiviullu pissutsinut nalimmassarneqarnissaa pillugit Naalakkersuisut 2013 –imi suliakkerneqarnissaat pillugu Inatsisartut aalajangiiffisassaattut siunnersuut.**

(Naalakkersuisut siulittaasuat, Aleqa Hammond, Siumut)

### **Saqqummiussissut**

(Naalakkersuisut siulittaasuat, Aleqa Hammond, Siumut)

### **Siullermeerinnineq**

Nuummi Umiarsualiviup allilerneqarnissaanut tunngatillugu 2013-imi upernaakkut inuiaqatigiinnut aningaasatigut qanoq kinguneqarnissaanik naliliinerit sukumiisut Assartuussineq pillugu Isumalioqatigiissitap inassuteqaataanut naapertuuttut pisimapput. Qanoq kinguneqarnissaanik naliliinerit tunngavigalugit Naalakkersuisut Nuummi nutaamik umiarsualiviliortoqarnissaanik siunnersuuteqarput, tassani pineqarlutik kitaanut sammernganut talittarfiliinissaq qeqertallu Qeqertat aamma Fyrø-p akornqatigut alliffissalerlugu umiarsualiviliornissaq.

Nuummi umiarsualivik umiarsuarnit anginerusunit taliffigineqartalernissaanik annertussuseqassaaq nunalu tamakkerlugu pingaarnertut umiarsualiviussalluni. Nunatta sinnerata pitsaanerusumik kiffartuunneqarsinnaanera periarfissaalissaaq, tassa usit nunatsinnukartut umiarsuit anginerusut nalinginnaanerusullu aammalu avatangiisinut mianerinninnerusut atorneqarsinnaalissammata. Usit Nuummi umiarsuarnut immikkut ittumik sananeqarsimasunut umiarsualivinnut mikinerusunut tulassinnaasunut nussorneqartassapput.

Sanaartornerup nalaani aningaasaliinissamillu naleqquttumik pilersaarusiornissaq eqqarsaatigalugu 2013-imi Naalakkersuisut nutaamik ingerlatsiviliornissaat siunnersuutigineqarpoq, tassani Nuummi nutaamik umiarsualiviliornissamik sanaartornissaq ingerlatsinissarlu siunertarineqassallutik. Aktiaateqarluni ingerlatsivimmik pilersitsinermut atatillugu aningaasaliineq ilaatigut nunatta karsianiit aningaasallinissamik isumaqarpoq aamma maanna umiarsualivimmit aningaasaliinikkutaaq. Taama aaqquissuussinerup malitsigissavaa umiarsualivimmik ingerlatsinerup sunniuteqarluarnissaanik aammalu umiarsualivimmi nutaanik atorluanissamik pitsaanerpaamik periarfissaqalerfiusinnaalluni.

Piginnittuunissamik ilusiliusseq siunnersuutigineqartoq siunissami piginneqataarusussinnaasunik periarfissanik qulakkeerinnilluartuussaaq, namminersortunit aningaasaliinertigut imaluunniit kommunit piginneqataanerisigut tamanna naleqquttut nalilersorneqarsinnaappat.

Kingorna UPA2014-mi pilersitsinermut aamma sanaartornissamut inatsimmik tassanilu ingerlatseqatigiiffiup siunertaanik aalajangersaaffiusumik Naalakkersuisut saqqummiussissapput. Siunertaq tassaassaaq ingerlatseqatigiiffiup maleruagassaani allassimatillugu Nuummi umiarsualivimmik, tassungalu assingusumik ingerlatsivimmi, umiarsualivimmik atortuinillu niuernikkut tunngaveqartumik sanaartornissaaq, piginnittuunissaaq ingerlatsisuunissarlu. Kiisalu Ingerlatseqatigiiffiup siunertaa tassaassaaq aningaasanik atorluaalluni umiarsualivimmik ingerlatsinissaaq taamatullu nunatsinnut nunatsinniillu, kiisalu nunatta iluani imaatigut angallissinermik pitsaasumik pilersitseqataanissaaq.

Taamatut oqaaseqarlunga aalajangiinissamut siunnersuut manna Inatsisartunit oqaluuserilluarneqarnissaanik kissaassillunga ingerlateqqippara.